# السيد موسى جاد الله

# شط الوداع

أشعار

طبعة أولى نوفمبر ٢٠١٩



### بطاقة الكتاب

شط الوداع	عنوان المؤلف
السيد موسى جاد الله	المؤلف
أشعار	التصنيف
۲۰۱۹ _ ۲۰۳۸٤	رقم الإيداع القانوني
9 7 7 9 7 7 7 7 7 7 7 7 7 7 7 7 7 7 7 7	الترقيم الدولى
١٦٥ الطبعة الأولى نوفمبر ٢٠١٩	رقم الإصدار الداخلي
۹۸ صفحة	عدد الصفحات
مؤسسة النيل والفرات	تصميم الغلاف
14x20	المقاس

جميع حقوق الطبع والنشر محفوظة للمؤلف، ولا يحق لأى دار نشر طبع ونشر وتوزيع الكتاب أو ترجمته أو الإقتباس منه أو نشره على النت الا بموافقة كتابية وموثقة من المولف





### إهداء

ريان يا شعر ريان والنظم كلة باذنجان ولا قفية ولا حتى موسيقى وعلى الله ينول الاستحسان

السيد موسى جاد الله

### شط الوداع

الوجه الاخر والرائع ايضا لشاعر العامية المتألق والمتجدد السيد موسى المبهج المفرح فى كل دواوينة، اما فى شط الوداع فهنا تجد الوجة الاخر لشخصية السيد موسى بكلماته السريعة والمتلاحقة والعذبة...

عكس الاتجاه - أقفل ببيان الخوف، شد الرحال- واسلك طريق الامل- من غير رسوم-، مون من حلمك-من سلسبيل الامنيات هنا تجده يدعم الامل والحلم ويواجه الخوف بالأمنيات مهما كانت الضبابية والعتمة، وتجده يقوى فينا الصبر.

من درویش...

ولسه الصبر ماشي في سكة المعاتية الدنيا دي ما تسواشي. مهما الزمان يأتيه

وينادى فينا الهمم فى الودع

قوم يا جدع ...وشوش بحزنك الوداع.. اصل الوجع حبة اهات متبعطرين فوق الورق الليل سرق من عمرنا ضى النهار مرفوضة كلمة انتظار.



الله عليك شاعرنا المحبب الى قلبي وعقلي دائما، يخطف الانظار بعذوبة كلماته ورقتها وخفتها.

كأنك يحاورك. لديك القدرة العجيبة على ان يجعل حديثة العادى شعراً ونقداً فصحى وعمى.

هو غزير الاصل والمعنى والكلمات والصور الجمالية ،

دمت معبراً

جياشاً عابراً بنا الى بحر الامل

أ.د/ جمال محمد حماد استاذ علم الاجتماع كلية الاداب – جامعة المنوفية

### عكس الاتجاه

أقفل بيبان الخوف شد الرحال واسلك طريق الأمل من غير رسوم موَّن في حلمك من سلسبيل الأمنيات أمشي في سكة مستحيل عدي مطبات الفشل وخُد يمين بين لحظتين حوَّد شمال تلقى إشارة غربتك



فاتحة شاشة الذكريات آهات حزينة مكلبشة جوا ساحات العيون دوس وزود خطوتك فوق المرار صهد السراب هيكعبلك أدي انتظار وهدي علي عتب النجاح وخد نفس فتِّح شرايين السعادة وعيش لحظتك تلقي الفرح فارد إديه عند الوصول دوق بسرعة نشوتك



ساعة الانتصار علِّم علي جبين فرحتك شاۋر سىلام وفجأه يطلع صاحب الطريق استني عندك اديني رُخْصة دنيتك إيه كُنيتك للحظة تسرح في اللي كان أتاريك جبان وماشي عكس الاتجاه ياحسرتك

### درویش

ولسه الصبر ماشي في سكة المعاتيه الدنيا دي ماتسواشي مهما الزمان يأتيه

درويش وقاصص خطوط الضي من فوق المنابر معذور ياأهل الحي علي البعاد مش قادر



تمتم حروف الولع في صحبة الأوليا قلبه تعب واتخلع من عشْقُه للأنبيا

رافع إيديه للسما مين يجبر الخاطر؟ كاتب كمان مظلمة مجذوب ولكن شاطر

حاضن بعينه النجوم مدد يامولانا رامي عليك الهموم والآهة في غنانا راصص قلوب المريدين خدوا خلاص العهد يطّوح راسه يمين تقطف شماله الشهد

السكة خضرة مضلله علي كل غاوي بالذكر آهي مهلله مين اللي ناوي

دقو دفوف الرضا قولوا صلاة الزين ساعة وصول القضا تلقى الهنا صفين

# الودع

قومْ ياجدَعْ
وشوش بحزنك الودع
أصل الوجع
حبه آهات متبعطرين
فوق الورق
الليل سرق من عمرنا
ضي النهار
مرفوضة كلمة انتظار

طارح آلام جارحة الثواني ارجعلى تانى وهات معاك عشق السنين رجع حنين ولهفة شوق في عيون السكاري ألفين خسارة الهمسة صبحت وحوحة فيها الأنين رايحين لفين ياسارقين الفرح من حلم العذارى احنا حياري احنا ف بحر الهوي متسلسلين مد الايدين واحرت قلوب عطشانة ميل



الهم زيل
رشرش سنابل ضحكتك فوق الوشوش
حلَّق وحُوش
ع العمر اللي سابق حلمنا
خليك هنا
وامسك في طرف الذكريات
صرخة سكات
أطلقها جوا ضلمة السكون

ردد وقول

ياحلم مرسوم فيه الأماني ياكلمة مدبوحة فوق لساني ياصبر علقم في كاس دموع إمتي الرجوع ملينا من كتر الخداع حان الوداع حان الوداع وارمي الودغ علي الشطوط عدي وفوت وشوف معانا زمن البدع

قومْ ياجدَعْ



# رأيي بصراحه

عايز أقول رأيي بصراحة نفسي ألقي فيها راحة مين الصادق والكداب؟ العصفور ولا الغراب؟ لتنين ناحوا بكل وقاحة

عيشه غم كلّه نار ذقنا فيها كتير مرار الحياة صبحتْ كآبة عتمت بين السحابة الزمن ليه بس دار دنيا سارقة الفرحة منا دايرة بينا غصب عنا مهما نديها الأمان شدانا من جوّا الودان زارعة نار الحقد بنا

قوللًي ليه سايبه الديابة ينهشوا في لحم الغلابة استحلوا كل شئ والظالم أصبح برئ حلوة بس لسه غابة

حلمنا بقي ليه سراب؟ شَعْرنا من بدري شاب عمرنا ضاع مننا واتهد حيلنا كلنا لما نور العدل غاب

ياللي إيدتوا في إيدينا احنا بيكم ليه ابتلينا الآنين زاد الآلام قصره وخلاصة الكلام مات خلاص الحلم فينا

### الحضن البارد

جايا تقوللي حضنك باردء وانا في عنيكي كنت المارد كنت المرسمى لبحر حنانك الايد الكاسرة لليل أحزانك وفكرك فيا ياما كان شارد

مش ندمانة علي إحساسك ياللي في لحظة بعتي ناسك ونسيتي حاجة كانت بنا وصور جميلة اتقالت عنا راح تشربي المر في كاسك

عادي جدا دا يكون ردك عيشي مين قدك الما الدنيا تعلي عليكي شوفي مين غيري هيكون ليكي مين راح يمسح دمعة خدك

ابقي ساعتها افتكري المارد وازاي كان جناحاته فارد فارد حلمه ليكي طريق جوا جراحه طب غريق يظلم نفسه كان شئ وارد

أنامش هاندم علي إخلاصي وازاي كنت بداوي وأواسي مهما تعدي عليا سنين قلبي وربي عليكي شاهدين بكره هتيجي تبوسي علي راسي

# رصيف الوداع

من فوق رصيف الوداغ علي عتابات السفر شديت رحالي أنا اللي كاره الخضوع

غمضت عين الذكريات ودفنت كل احلامي بين السحاب ف وسط حبات الدموع علي جدار الزمن علقت توب الأماني بشماعة المستحيل ورجعت أدور ع الشموع

مونت مركب رحلتي من كاس مرار فارد شراع من غير قلوع

عزفت حكمة القدر من نوتة الحيرة لحن الرضا ليه مش مسموع علي حرف النهاية فتحت بَرْجل خطوتي شمال يمين تايه مابين الربوع لميت طرف الطريق زودت سرعتي بفرامل الأمل أتاريني في الممنوع

> مسكت طارة الزمن حسبت عداد السنين العمر راح والحُرقة ساكنة الضلوعُ

يا موزَّعين جداولْ الصبر فوق جبين المجروحين فين حصَّتي ؟ دانا الموجوع

يا سكة مرصوفة بالوجع جرح الليالي نازف آهات وحنين مستنين ساعة الرجوع

### ما بین حرفین

ما بين حرفين أنا تايه وساكن قلبي آهات وحنين أنادي الشوق ومش عارف أداوي جرح فيا حزين

بلملم من حروف الضيّ معاني اللهفة اللي جوايا وأجدل من عيدان الصبر في كام ضحكه وضلايا وأرسم بسمة في شفايفي وعلي جبيني تدوب شمعة تزيد الدقة في قلبي وتطرح في العيون دمعة

تطفي نار العشق القايده تنسم في عبير لقانا تبدد حرقة في ضلوعي في عز الفرحه فاكرانا

دى كلمة حب موصوفة يدوب فيها كتير عاشقين وياما ناس قالوا فيها وكتبوا كمان ليها دواوين

# أنا قلبي

أنا قلبي ساقية دوَّارة بيفضتي ويعبّي الهوي غرقان في بحر الشوق ولا بلقي منه الدوا

عيوني في الغرام جندول بتروي عطش الخدود يفور الدم في عروقي بالحسرة تمللي يجود

أناجي طيف في خيالي ترجع اللهفة جوايا وأقطف من بين الضلوع كام آه وآه لغنايا

يا زارعين الصبر في جوفي جزع المرار طارح مابقتشي عارف في سكتى بكره من امبارح

من وسطه عتمة السنين لميت شعاع الضي أنا اللي ماتت فرحتي والاسم عايش حي

# وجهة نظر

### الحياة

ساعاتْ ودقايقْ محسوبةْ متسلسلة في الأمنيات الخطوة فيها مسلوبة مخنوقة فيها الأزمنة

#### الموت

حقيقة صادمة ومؤلمة مكروة بخوف الرحيل النفس ليّه مسلمه والحكمه منه أكبر دليل



### الكون

حبة فضا متجمعين فيها الخلايق مترميين جوا مشيئة القدر فيه اللي ماشي واللي سايق واللي اللي راكب فوق البشر

### الحزن

بستان آهات من الألم بنحيي فيه الذكريات متلفحين بلون الليل دايما بنبكي ع اللي فات

#### الصرخه

نغمة بدون نشاز ترتيله يعلي صداها وجع مكتوم حرقته بتهد حدت الآها

#### الصبر

مراكب تايهة في بحر الشوك شايلة أنين الابتلاء ومهما يعلي موج المرار متحملة حتى آخر الانتهاء

### الحلم

صورة مرسومة في سكة مستحيل رتوش بتغزل أجمل حكايا طريق طويل ملوش نهايا والنوم دليل على إننا ميتين

#### السعاده

راحة ساكنة قلب الرضا طاقه نور مفرودة فوق الوجوه دايما تلبي كل ندا والبسمة عمرها في يوم تتوه

### العشق

عله في القلوب مِمَدده تصحي النبضة والدَّقة يضخ اللهيب في الأوردة نرضخ أوام منقولشي لأَه

#### انت

يا اللي ترابك غالي علينا احنا عشانة ياما ضحينا مهما روحنا و لا جينا إنت برضو أغلى ما لينا

إنت العمر بكل جراحه إنت عذابه كمان أفراحه إنت واحة الشوق و براحه إنت فرحة طالب بنجاحه

إنت الكلمة و انت المعني انت الآه اللي بتوجعنا مهما تزيد فيكي أوجاعنا إنت الصورة اللي بتجمعنا

إنت اللقمة اللي تكفينا إنت البسمة اللي بتشفينا إنت النسمة اللي تدفينا إنت أجمل حاجة فينا

إنت الحاضر و إنت الماضي انت مليتي القلب الفاضي انت ميزان العدل لقاضي مهما أشوف منك أنا راضي

# بحر الكلام

من جوّا بحرْ الكلامْ نشَلتْ كام حرف و قلت أنا صياد صبوا عليا الملام رموني علي الجرف وقفوالي بالمرصاد

فردت في شباك المعاني بكام كناية وتوريه رسمت بيها صورة سيبت في خيالي يعاني و قلت دي حرية أتاريها كات فزوره

ما بين الكسر و الرفع و شد الفتحة و الضمة أنا ضليت الطريق ما نابني اللي الصفع وسط الزحمة و اللمة مع إني بريء كان نفسي أسبح وسط البحور ولم كام شطره و زين بيها قصيدتي اكسَّر في سم الغرور و اكتب علي الفطرة وأداري بيها خيبتي

يا مزينين في معني الكلام و مشبعين كل القصايد بلائالء مضويه يا صيادين لموا سكاكين الملام مر النصيحة زايد خفوا بقي شويه أنا اللي شايل الوجع وأترجمه علي الورق في شعور وإحساس لاقلت في يوم البدع صياد لكنه غرق عشمان تحبة الناس

# أنا اللي ماشي

أنا اللي ماشي سكتي
تايه حزين اللي عمال اداري في دمعتي
و ماعرفشي فين هتكون نهايتي و آخرتي واروح لمين العمر فات و دي قصتي مع السنين مع صحبتي قضيت حياتي مع صحبتي شمال يمين

نفسي دي كانت علتي بين البابين و كل ما ارضي شهوتي و افرح يومين ما لقاش في معني لضحكتي

و ارجع حزين
اللي عملته في دنيتي
يندي الجبين
ضليت وقلت دي قسمتي
و اهرب لفين
كتمت آهة صرختي
صبحتْ طنين
رفعت إيدي بشكوتي
وكلي أنين

يا رب واقبل دعوتي
انت المعين
قادر تبدل صفحتي
دا انا مسكين
استرني و استر ذلتي
دنيا و دين
دا اللي رسم لي غلطتي
شيطان لعين

#### بين كفوف القمر

بين كفوف القمر حطيت أنا خدي ميل عليا الشجر طالب كمان ودي

سائني ليه الحذر دا العمر بيعدي رديت وقلت البشر ظلمه طفَحْ عندي

القلب يا ما انفطر صبَح الأنينْ ردي عليل وجرحه انتشر عدي حدود حدي



نسيت ليالي السهر حالي ما هو بيدي نفسي مليها الضجر م الشكوى بتعدي

شارب مرار القدر قولوا لي مين قدي حكمه علينا صدر بلاش بقى تعاندي

دنيا عديمة النظر دايما توقف ضدي شلت ايدين القمر والدمع فوق خدي

# اوعى تلوم الصغير

اوعی تلوم الصغیر طول ما الکبیر خیبان وقت العتاب یتدیّر یعمل لی فیها زعلان الوش یبقی مأیّر والغل فیه بیبان اسود سواده مجیر زی الحجر صوان

بالرزق ليه بيعير وهو كان غلبان دلوقتي حاله اتغير صبح غني ومليان ساعة الكلام بيتغير ويعيش دور الجدعان منه بقيت متحير وصنت أنا اللسان كبير بفعل صغير وطبعه لسه جبان العمر قلنا قصير أما صحيح إنسان

#### حکم

إكتم أنين شكوتك مهما الزمان يرازيك وأصبر على بلوتك لحد يشمت فيك

وأحفظ تملي كلمتك وقت العتاب تحميك ومهما كانت حرقتك الصبر راح يداويك

أمسك بأيدك شمعتك وداريها ليل ونهار وأحسب خطاوي سكتك في بداية المشوار

أرضي بكل قسمتك لو حتى فيها مرار بكره تجيلك فرصتك والبركة في الإصرارْ

إفرز ونقي صنحبتك دقق أوي واختار اللي يقاسم لقمتك لازم يكون مغوار

يمسح بأيده دمعتك ويحفظ أوي الأسرار ويوم ما تغدر دنيتك يعدي بيك النار

## الكلمة والغنوة

صحيح الغنوة عمرها ما داوت جرح ولا الموسيقى وزعت علينا الفرح لكن بنسمع كلنا نغمات في دقة قلبنا وعشان نبين حبنا يطول الشرح

بنغزل م الحروف في كلام ونعزف كل دا في أنغام تهز النغمة جوانا مشاعر طايرة ف سمانا ترفرف فوقنا وتهفهف كما الأحلام

نشد بأيدينا في أوتار الحب ونعشق سحر أيامه كمان ونطب وتبقى الآهه غنوتنا وليل يا عين دي شكوتنا لو كاس المرار علينا إتصب ومهما نداري إحساسنا من اللايمين تعدي علينا أحداثنا وتطوي سنين نلاقي قلوبنا تتحجر والدمع في عنينا يتفجر هتفضل برضو كلمتنا ليها عاشقين

#### خرابیش

الدنیا یا ناس خرابیش بتجرح کل مکان ملیانه کمان خفافیش الضلمه لیها أمان

لو غزنا ما بتديش الفرح غير بميزان والكفه ما بتقضيش لو خفّت الأوزان

وإن قولنا يا دنيا نعيش نلاقيها أبراج أحزان أيامها ما بتعديش ونشيب قبل الأوان

وحلمتء بسئوق العيش معذور أنا برضو جعان أسأل ع الحظ ما فيش من يومي يا ناس تعبان

حتى البخت ما سبنيش وفاكرني زي زمان وبقيت زي الدراويش وحياتي جنان في جنان الصبر غيره ماليش ع الهم وع الحرمان لو أحس إني معاييش على طول أدعي الرحمن

یدینی ما یحرمنیش وکافیه إنی اإنسان مکتوب له فیها یعیش لو یرضی یکون فی أمان

لو بالمقسوم مرضيش يبقى زي الجديان يجري ويروح ما يجيش عمره ما يكون كسبان الدنيا يا ناس خرابيش

# أقتلهم بفرحتك

أقتلهم بفرحتك وأدفنهم بابتسامه وإللي باع دنيتك قول له ألفين سلامه

وفر في دمعتك وأنسى غدر الزمان وإن كانت غلطتك دانيا وملهاش أمان أرميهم من حياتك ما تقولش أزاي وليه خليهم في ذكرياتك والماضي أردم عليه

ألهمسه من سكاتك برضو ليها دليل وإن عابو إبتساماتك خليك أنت ألاصيل

أبعد ولا تسال فيهم وقفل باب الملام أوعى تعتب عليهم دا كبيرهم الكلام كفاية تشوف عنيهم فيها حسره وألام واللي زرعوه بأيدهم حصدوا منه أوام

أكتم بأديك أهاتك هتحوش ألسم منهم وأدعى في صلاتك ربك يغنينا عنهم

عوض اللي فاتك وعيش الحلم تاني دور هتلقي ذاتك وتعود كل الأماني روح نور شمعتك طلع شمس النهار لو شافوا ضحكتك المر يزيد مرار

قوم غني غنوتك سمع كل العزال قول بختي وقسمتك يتغير حال بحال

### حضن الأسى

حضن الأسي بيمر علي الجبين يفرد قلوع الحزن فوق السحاب والفرح ليه يتخنق قبل الميلاد زى وليد أتولد وفجأة شاب الروح تعافر أوي بين الضلوع تكسر تابوت الزمن لجل الحياه الحلم فينا بينتحر بدون سبب عجب العجب وهو لينا طوق النجاه لملم خيوط الألم ضفر جراحك وأجدل أنامل الصبر حاول تداوى وأجدل أنامل الصبر حاول تداوى

ياعاشقين الخوف آن الآوان تسمعوا صوت الأمان زي الغناوي باب الأمل مقفول ومشمعينه سواد الظلم فيه مبدور طارح مرار وارب طاقة العناد بسيف المستحيل ارسم شعاع الصوت بكل دار اطلق جناح الشوق رفرف بالأماني وزيل المعني من كلمه وداع بكر هيجي الضي من بعد ليل يمحى ظلام الجفا بعد الضياع

# ومين غيرك

ومين غيرك يشق الليل ويملالي الحياة تفاريخ وامد إيدي علي جبينك و أقطف شعاع النور اشرب في كأس الرضا واسكر بقلب جريح وأبدر الورد في بحورك بجدايل داير مايدور

يا زهرة طرحة الندى
فوق طرف السحاب
أنا عشقت لون الضي
في سحر عينيكي
يانجمة عالية مفتحة
وسط غيم الضباب
رفعت راية لهفتي
وسلمت القلب ليكي

مهما الزمان يقيد خطوتي في سكة العاشقين راح تفضل شعلة شوقي تنور سلاسل ضحكتك وارسم في حروف حنيني المتبعطر فوق السنين

#### دا كفاية عليّ إني أشوف حلاوة فرحتك

رميت خدي علي كفوفك
زي طفل رضيع
تزيد دقاتي بلحن الخوف
من مرار الهجر
والروح تعافر وسط الضلوع
تخاف للحلم يضيع
أسبح وأطير في جنك
لجل ماوفى الندر

#### البخت

البخت ليه عضعض طريقى ماعدش حاجة تبل ريقي ومها أشكي للزمن أنا اللي بدفع الثمن الكل باع حتى صديقي

قالوا قدر مكتوب علينا بنحس بيه قبل عينينا بنعيشو واحنا مرغمين وفيه ندوق قهر السنين كفّ الزمن كتّف إيدينا الصبر ليه مابقاش يداوي علقم مرار كأنه ناوي دايما يجدد في الجراح ماسابشى لينا فترة سماح يعتب عليا اكمني غاوي

أيوه غاوي غصب عني الغدر دا ماكنشى مني حظي كدا وأعمل إيه هفضل أداري واصبر عليه مستني يوم يخلف فيه ظنى

## بذر العفن

بذر العفن مبدور طارح سنابل مر شردالزمن محفور خلي الجبين أتحر

عرق الكفاح مبتور والقهر منه يشر الأرضْ صبحتْ بورْ الضرع صابه الضرر

الفقر لما يدور يطحن ضلوع الحر يبقي الجناح مكسور وحاله مش بيسر وسط الكلاب محشور والكل منه يفر أيام وراها شهور السعد مش بيمر شر البشر مسرور تمللي يشكي النّبْر علي الحقوق بيجور

نازل بتقله هَبْر تلقاه كمان مسعور ناسي معاني الصبر ومهما عاش في قصور بكرة يلمه القبر أفرد شعاع النور وانسي حروف الجر جدف مابين البحور تعرف تلاقي البر ازرع تقاوي زهور عيدانها راح تخضر وعلشان تجاري نسور محتاج مخالب شر

### شط الوداع

شط الوداع اتقفل علي دمعتين من جوًاعين شقوا الطريق فوق الخدود فين الوعود وحلم عشناه زي السراب الضي غاب في عز لهفة قلبنا خليك هنا وامسح بإيدك صهد الفراق العشق داء وآه ساكنه جوا القلوب

ازاي نتوب وكل دقه إعلان ولاء فين الوفاء وطرحة الحزن بالهم مفروده ارجع بعوده شقشق الفجر على الوشوش دارى الرموش واقفل على سهم الوجع لم الرقع من قلب زحمة الآهات عدي الساعات فاض الحنين من غربة الأيام وسط الحطام راح تلقى دقه بتناديك

ملهوف عليك ونار شوقي كما البركان والله زمان طل القمر من ع الجبين داوي السنين وجرح نازف في المنام قوم قوام واردم شقوق بحر الجفا أحي الصفا واكسر في ثلج البعاد بلاش عناد حوط على العمر اللي باقي دور سواقى واروي عطش حضن اللقا ساعة الوداع

# سلسبيل الأمنيات

من سلسبيل الأمنيات وسط أحضان الرحيل وسط أحضان الرحيل والليل بيفرش السكات والصمت زي العليل مدّد سكون الإرهصات علي جناح الأصيل الخطوة رجت الثبات كأنها بألف ميل

زلزلنا أركان الساعات ضمينا اطراف الليل دقة قلوبنا همهمات تسهر الرمش الكحيل والعين تغازل الراحات والدمع نازل سيل فتحنا باب الذكريات شقينا ضل المستحيل الحلم مخنوق بالآهات والأمنيات طريق طويل

# لساكي يا كلمة

لساكى يا كلمة مدبوحة ما بین سطرین لساكى صابرة ومجروحة وهتشكى لمين؟ ليه وقت الحق مبحوحة ومش سامعين! وف ساعة الظلم شرشوحة من الساقطين! عملتي علينا انزوحة علشان صابرين وصفتي في دمعة مفضوحه

على الخدين وقلتي ده آه سنكوحه بلاش تفانين فى زرع القرع بحبوحه آلاف فدادين وفي كل ساحة مطروحة آهات وضنين عقيمة الفكر ممسوحة وبيها سارحين فى قدس المعني مشلوحه حال العاصيين يا قصه بس ملوحه نهايتك فين

### یا دنیا عیب اختشی

یا دنیا عیب اختشی زاد الألم فینا الفرح سابنا ومشی ولا شیء یداوینا سهل علیکی تکبشی م الحزن تسقینا لحد امتی تخربشی تخدی ما تدینا؟

ساعة الفرح تطنشي في الهم ترمينا وساعات كتير تغلوشي ع الصرخه تصحينا وسط جراحنا تنبشي ولا لحظة تنسينا لیه بس تتحرشی وتعذبي ف أهالينا كل الخطاوي تكلبشي وتطلعي عنينا

لسه كمان بتحوشي كل الجراح لينا الجراح لينا اوعي يا عين ترمشي دمعك يعز علينا بلاش كمان تفتشي سر العذاب فينا

القلب لیه یتحشی مر وأسی کوینا القهر فیه ینتشی مع انه مالینا دلوقتي جايه تدروشي قال ايه توعينا ماكنتي قاعدة بتروشي ماكنتي قاعدة بتروشي وتريشي فينا شاطره يا حلوه تلوشي وتخلصي علينا أرجع وأقولك اختشي خلاص قتلتينا

# رحاية الزمن

تدور رحاية الزمن تطحن أمانينا فيها بندفع التمن ومين يداوينا تضيع حلاوة عمرنا ومهما نداري جرحنا برضو تبكينا

نبدر بدور الرضا تربطنا بلجامها تطرح بطول المدي المر قدامها تسبق خطاوي صبرنا وبختنا وبختنا ونعدي أيامها

بتنزرع جوا أحلامنا كلام وحروف يزهر ورد بستانا ماليه الخوف يفوت العمر في ثواني ونرجع للحزن من تاني بشوق مخطوف



تشرق شموس الأمل نلملم الأحزان نوصل نهاية الأجل نخفف الأوزان نرجع نجدد حلمنا نمسك بقوة فرحنا ونعدد الألوان

هدّي الرحاية يا زمنْ احنا انتهينا ماعادشي فاضلْ في البدن حاجة تدارينا دايما قاسي علينا على فين مودينا أهدى ورسينا

### أنين الصمت

اكتم أنين الصمت في بحر الكلام واعزف علي شكوتك نغمة حزنك المدفون دارى جراح السنين من غربة الأيام كل القلوب اتحجرت واش يعمل المفتون؟ اكسر جدار الآهاه من تلافيف الغرام من تلافيف الغرام

داري علي حرقتك العشق فيك مسكون ياللي ارتويت المرار وشبعت من الآلام شبح الوجع طير القهر فيه موزون القهر فيه موزون تاهت بصيرة الأمل والوهم في الأحلام لملم حوايا الروح وانزع فتيل السكون

عدي جبال الصبر
كن للحيارى إمام
افرد جناح خطوتك
اطوى بعاد الكون
ارسم تجاعيد الزمن
علي سرب اليمام
امسح حدة الوشوش
واخلف مساوئ الظنون
ضلمة الليل دفا
يدوب فيهاالكلام

الورد لغة العاشقين مهما يمل الغصون الحضن عبير الفرح مهمايزيد الملام تلقي الهنا ممدود معاك فين ماتكون معاك فين ماتكون اوعي تخاف المستحيل وانت وسط الحطام الدمع مهما يسيل يفضل جمال العيون

#### الدنيا سطر

الدنيا سطر في كتابك وانت الموضوع بتمشي الخطوة في حسابك بدون رجوع وتشرب المرار فيها تعافر وسط لياليها عشان الكل غاويها وفيها مخدوع بتنزف خوف في أحلامك
وتطفي شموع
وتغرق في بحر أيامك
من الدموع
وترسم صوره وتصور
وتعشق كمان وتتهور
تحارب فيها وتدور
ما تلقى دروع

ومهما تعلي في صوتك
ما هوش مسموع
تداري ألآه في سكوتك
كمان ممنوع
وتبكي سنين على حالك
تغني بحزن موالك
وتقضي الباقي من عمرك
حزين موجوع

#### أحزان

بتجري في العروق أحزان وحتى الآه بتكويني ودمع العين صبح بستان بيطرح شوك يواسيني شربت المر مع الحرمان ماعدشي شوق يدفيني وبروي قلوب وانا عطشان ومين فيكم يداويني؟ قلولى فين ألاقى حنان؟ وهمسة حب تشجيني بحبك وانت ليه زعلان؟ ومش عايز تراضيني

### ياسفينة الحب الغرقانه

ياسفينة الحب الغرقانه علي شط الحب الممنوع شایله فی مشاعر بهتانه شاربة من مر المنقوع وبسهم الشوق ليه سرقانه والقلب دا لسه موجوع اللهفة في العينْ سهرانة اللهفة والآه بقى صوتها مسموع الخيبة تصب على قفانا م الصدمة بنقول ملسوع

لناس م العشق هربانة بتجرّ في حيلها المقطوع م المغرب بتبات نعسانه والجوف متقطع م الجوع وكبيرها تندغ في لبانه مع إن الضغط مرفوع من كتر الهم تعبانه ولبيتها بتحلم برجوع رافعين الرايه الخسرانه ومصران الهوي بقي مفقوع بنداري في حاجات وجعانه ونعدي أيامنا في خضوع ولا نسأل علي فين وخدانا والصبر بقى فينا مزروع الجرح ليه عتق جوانا وبتنزل على الخد دموع دا الضحكه تملى مفارقانةٌ والفرح بقي منها منزوع يامراكب سايره وفايتانا كل اللى ركبك مخدوع

## قال الغرام

قال الغرام كلمته واتجمعوا العشاق الكل سابق خطوته باللهفه والأشواق ومهما داقوا قسوته مابيقلوش حرَّاقُ ماشين لآخرسكته حتي ولو بفراق

الكل راضي بقسمته الكل ليه مشتاق؟ ولاحد بين شكوته وسجله في أوراق العشق بانت قدرته جوا القلوب انفاق وتزيد علينا لوعته يبقي الغرام ترياق

### محتوى الكتاب

٣		الإهداء
٤		شط الوداع
٦.		عكس الإتجا
٩		درویش
١ '	۲	الودع
١,	٦	رأيى بصراحا
١ '	٩	الحضن الباره
۲.	ع	رصيف الودا
۲ ،	o	ما بين حرفين
۲,	٧	أنا قلبى

	وجهه نظر
٤ ٣	أنت
٣٦	بحر الكلام
٤.	أنا إللى ماشى
٤٣	بين كفوف القمر
٥٤	إوعى تلوم الصغير
٤٧	حکم
٤٩	الكلمة والغنوة
> 4	خرابیش
00	إقتلهم بفرحتك
۶ ۹	حضن الأسى
11	ومين غيرك
1 £	البخت
<b>《</b>	السيد موسى جاد الله
	استيد شوسان جاد الما